



Sesida dals

17 d'avrigl 2023

Communitgà ils

19 d'avrigl 2023

Protocol nr.

312/2023

Dumonda Preisig

concernent collecziun da plastic e reducziun dal consum da plastic

Resposta da la Regenza

A maun da la statistica dals ruments da la Confederaziun che vegn publicgada annualmain, èsi evident ch'en Svizra resultan dapli ruments da plastic per persuna ch'en auters pajais europeics. Quai è en emprima lingia d'attribuir a la situaziun economica, perquai che tar tut ils tips da rument stat la quantitat da princip en ina proporziun directa cun la conjuntura. Per las buttiglias da PET exista gia in sistem naziunal da rimnar e da reciclar che funcziuna bain. Per auters tips da material sintetic èn resultads divers systems da rimnada ils ultims onns. Pertutgant rimnar e reciclar materials sintetics maschadads da chasadas, han l'Uffizi federal d'ambient (UFAM), la reuniun da las expertas e dals experts per rument e per resursas Cercle Déchets (CD) e l'Associaziun svizra Infrastructuras communalas (ASIC) publicgà cuminaivlamain in document da posiziun la fin da l'onn 2017. En quest palpiri èn els s'exprimids plitost cun sceptica envers rimnar materials sintetics maschadads da chasadas, perquai che la part che po vegnir reciclada sco materia dals objects rimnads è savens pitschna e perquai ch'ina part relevanta dals ruments sto la finala tut-tina vegnir dismessa termicamain en in stabiliment per arder ruments u en in'ovra da cement. Ultra da quai na datti actualmain nagins stabiliments per zavràr ruments en Svizra. Quai chaschuna savens vias da transport pli lungas a l'exteriur. Quai na ston dentant betg restar uschia. Sch'i reussescha d'augmentar substanzialmain – en il material rimnà – la part dals ruments reciclads sco materia (recycling) en cumparegliaziun cun la part dals ruments reciclads termicamain, pon er las collecziuns maschadadas da material sintetic da chasadas daventar ecologicamain ed economicamain interessantas. In tal sistem da rimnar e da reciclar fiss cunzunt alura effizient e persistent, sch'el vegniss introducì sin plaun naziunal en l'entira Svizra.

Tar la dumonda 1: En il rom dal project «Collecziun 2025» lavuran actualmain sin plaun naziunal diversas organisaziuns per lung da l'entira chadaina da valorisaziun vi

d'in sistem da rimnar e da reciclar emballadis da materia sintetica. L'organisaziun Swiss Recycling collavura cun passa 50 ulteriuras organisaziuns sco producents d'emballadi, concerns da bains da consum, commerzis en detagl ed ulteriurs per introducir in tal sistem. En il Grischun datti gia oz divers purschiders da satgs da rimnada per materials sintetics da chasadas. Quests satgs vegnan purschids en differentas vischnancas. Resguardond quests fatgs e cunzunt en vista ad in sistem da rimnar naziunal na vesa la Regenza nagin basegn d'introducir systems da rimnar supplementars u da promover systems existents.

Tar la dumonda 2: Actualmain n'èsi betg raschunaivel da realisar mesiras ed instruments chantunals per simplifitgar e per promover la collecziun da material sintetic da chasadas sin plaun chantunal, perquai ch'in sistem naziunal da rimnar e da reciclar è gia en elavuraziun. Cun introducir ina soluziun naziunala, uschia sco ch'ella exista gia per las buttiglias da PET, po vegnir etablì in sistem da rimnar e da reciclar ch'è ecologicamain ed economicamain efficient.

Tar las dumondas 3 e 4: En il rom dal repassament da la planisaziun chantunala dals ruments durant ils onns 2021 e 2022 tras l'Uffizi per la natira e l'ambient èn vegnidas definidas tut en tut otg finamiras per la gestiun da ruments en il Grischun. La finamira nr. 3 pertutga l'evitar ruments. La planisaziun chantunala dals ruments cuntegna in plan da mesiras che permetta da cuntanscher las finamiras ch'èn vegnidas fixadas en il rom da la planisaziun. La mesira WS-4 pertutga la sensibilisaziun da la populaziun per materials d'emballadi e la motivaziun per cumprar products cun paucs materials d'emballadi. La mesira duai vegnir sviluppada e realisada tras las corporaziuns per la gestiun da ruments ch'èn responsablas per reciclar e per allontanar ruments chasans en il chantun Grischun. Las strategias surordinadas per evitar ruments stuessan primarmain cumenzar tar l'industria d'emballadi e tar la legislaziun da victualias. Questa incumbensa na po betg surpigliar in chantun sulet, mabain pretenda in proceder sin plaun naziunal.



En num da la Regenza

Il president:

Peter Peyer

Il chancelier:

Daniel Spadin